

MAJLIS PERASMIAN PERSIDANGAN

BANK NEGARA, KUALA LUMPUR, 3 Jun 1993

Assalamu'alaikum warahmatullahi wabarakatuh

Saya mengucapkan terima kasih kepada Institut Kefahaman Islam Malaysia dan Kementerian Kehakiman Malaysia kerana menjemput saya untuk merasmikan Persidangan 'Islam dan Keadilan' pada hari ini.

2. Semenjak beberapa abad selepas keruntuhan empayar Islam, dunia telah dikuasai oleh negara-negara Barat yang bukan Islam. Mereka bukan sahaja berjaya menakluki hampir semua wilayah di dunia tetapi juga dapat menakluki fikiran dan menyemaikan nilai-nilai hidup dan falsafah mereka. Konsep dan prinsip-prinsip keadilan mereka telah disebarikan sehingga dunia tertaksud dengannya dan tidak lagi menyoal akan baik-buruknya konsep dan prinsip-prinsip itu.

3. Di masa yang sama, negara-negara Barat ini menjadi kuat daripada segi ketenteraan dan ekonomi, dan menguasai berbagai-bagai ilmu, termasuk teknologi maklumat, yang mana semua ini membolehkan mereka menekan mana-mana pihak yang mencabar atau menentang prinsip dan nilai-nilai yang mereka sebarkan.

4. Demikianlah dengan konsep keadilan. Mereka bercakap tentang 'the rule of law' atau pemerintahan berasaskan undang-undang, hak kemanusiaan dan demokrasi atau kuasa suara ramai, tanpa mengambilkira bahawa ada undang-undang ciptaan manusia yang tidak adil, ada hak manusia yang keterlaluan dan ada suara ramai yang tidak waras. Demikian undang-undang Barat terlalu mengutamakan hak individu sehingga individu boleh membuat apa sahaja walaupun perbuatannya mengancam ketenteraman dan keselamatan masyarakat.

5. Undang-undang antarabangsa pula dibentuk supaya memberi hak kepada yang kuat menindas yang lemah. Demikian juga dengan hak kemanusiaan yang dijunjung begitu tinggi sehingga kegiatan kumpulan-kumpulan yang menggunakan kebebasan demokrasi untuk mengancam dan mengugut masyarakat sehingga tidak aman dan maju diberi perlindungan. Demokrasi atau suara ramai seperti di kalangan orang Serb di Bosnia dihormati walaupun tujuannya adalah untuk menindas orang Islam Bosnia. Walaupun jelas demokrasi membawa perpecahan, keruntuhan 'rule of law', penindasan, kekejaman dan kemiskinan yang menyeluruh seperti yang berlaku di beberapa bekas negara Soviet dan Eropah Timur, namun demokrasi dijunjung tinggi.

6. Di waktu yang sama, Barat tidak segan-silu membelakangkan prinsip-prinsip keadilan mereka sendiri jika perbuatan ini perlu bagi kepentingan mereka. Di Asia Barat, mereka kononnya

bertindak untuk melindungi orang Kuwait daripada kezaliman Iraq. Kononnya mereka bertindak kerana berpegang kepada prinsip kemanusiaan dan keadilan. Tetapi apabila keganasan orang Serb ke atas orang Islam Bosnia jelas berlaku, mereka memberi seribu alasan kenapa mereka tidak bertindak melawan orang Serb. Sebenarnya mereka bertindak di Kuwait kerana ingin melindungi sumber minyak mereka. Oleh kerana tidak ada apa-apa kepentingan di Bosnia, mereka sanggup membenarkan orang Serb membunuh, mengganas dan menindas orang Islam Bosnia.

7. Prinsip sebenar yang dipegang oleh Barat dan sebahagian besar daripada tamadun dunia sekarang ialah 'Kekuatan adalah Kebenaran' atau 'Might is Right'. Oleh kerana kuasa-kuasa Barat adalah kuat, maka apa sahaja yang dilakukan oleh mereka adalah adil. Oleh kerana orang Serb kuat maka rampasan wilayah Islam oleh mereka dihalalkan. Dan susulan daripada itu, oleh kerana negara Islam dan orang Islam di mana-mana sahaja adalah lemah maka segala perbuatan mereka adalah tidak benar dan tidak adil. Percubaan orang Islam untuk menegakkan semula konsep keadilan seperti yang disarankan oleh agama Islam dikecam oleh Barat sebagai percubaan untuk menegakkan semula cara-cara pemikiran yang sudah lapuk. Bahayanya ialah dalam kekecewaan dengan kelemahan dan kegagalan kita, orang Islam akan bertindak tidak seperti yang diajar oleh agama kita. Kerana kecewa, kita mungkin mengganas dan melakukan jenayah yang sama seperti dilakukan oleh musuh kita. Dengan itu maka terbukti benarlah dakwaan orang Barat. Inilah yang sedang berlaku di kalangan ekstrimis Islam.

8. Sejarah mempunyai banyak contoh tentang keadilan Islam. Apabila orang Rom menakluki Palestin, orang Yahudi diusir sehingga mereka terpaksa menjadi orang buangan di seluruh dunia, apa yang dikenali sebagai 'the Jewish diaspora'. Sebaliknya apabila Khalifah Umar Ibn Khattab menakluki Palestin, orang Kristian dan Yahudi dibenarkan tinggal di sana. Demikian juga apabila Khalifah Salahuddin Al-Ayubi menakluki Palestin, orang bukan Islam terselamat. Hari ini apabila Yahudi dengan bantuan Barat merampas Palestin, orang Islam ditindas, diusir dan dibunuh hari-hari, termasuk kanak-kanak.

9. Demikian juga di Sepanyol di mana orang Islam memerintah selama 800 tahun. Dalam masa itu, orang Yahudi dan Kristian kekal dengan agama mereka dan tinggal bersama-sama dengan orang Islam. Tetapi apabila Ferdinand dan Isabella menakluki semula Sepanyol, orang Islam dan Yahudi yang tidak melarikan diri ke Afrika dibunuh atau disiksa sehingga menerima agama Kristian. Sebab itu sementara selepas 800 tahun orang Islam memerintah, masih terdapat orang Yahudi dan Kristian di Sepanyol, tetapi apabila Kristian memerintah tidak ada seorang pun orang Islam yang tinggal.

10. Di Soviet Union semasa pemerintahan komunis, Islam di tindas sehingga tidak siapa berani mengakui mereka beragama Islam. Demikian juga di Albania di zaman pemerintahan Marxist.

11. Dan sekarang ini kita lihat ketidakadilan yang jelas di Bosnia. Sebenarnya di hampir seluruh dunia orang Islam ditindas walaupun dunia mendakwa bahawa pegangan mereka di zaman ini ialah kepada keadilan dan 'rule of law'.

12. Sebaliknya dalam Islam, agama yang juga merupakan cara hidup yang lengkap, keadilan adalah perkara utama yang jelas. Dalam Islam ditegaskan bahawa tujuan utama alam ini dijadikan adalah untuk menegakkan kebenaran dan keadilan. Al-Quran telah menegaskan dalam Surah Al-Hijr (15) ayat 85, maksudnya:

"Dan tidak Kami ciptakan langit, bumi dan segala yang terdapat antara kedua-duanya, kecuali untuk keadilan" Begitu juga dengan Surah Ad-Dukhaan (44) ayat 38-39, Allah Subhanahu wa Ta'ala telah berfirman yang bermaksud:

"Dan tidak Kami ciptakan langit, bumi dan segala yang terdapat antara kedua-duanya untuk main-main. Kami tidak menciptakan kedua-duanya melainkan untuk keadilan, tetapi kebanyakan mereka tidak mengetahui" Ayat-ayat di atas dengan jelas menyatakan tujuan sebenar bagi kejadian bumi dan langit ini, bahkan seluruh alam, ialah untuk menegakkan keadilan dan menghapuskan kezaliman atau kejahatan. Dalam Surah Ad-Dukhaan (44), ayat 38-39 yang disebut di atas, Allah sengaja menyatakan yang ciptaan alam ini tidak dilakukan untuk bermain-main. Alam ini tidak terjadi dengan begitu sahaja tanpa sebab. Ayat ini sebenarnya menafikan bahawa kejadian alam ini tidak bertujuan. Sebaliknya alam ini dijadikan untuk menegakkan kebenaran dan keadilan.

13. Sekiranya kita menerima hakikat bahawa alam ini dijadikan untuk menegakkan keadilan, maka kita sebagai manusia yang termasuk sebagai salah satu daripada kejadian atau ciptaan Tuhan, harus juga menegakkan keadilan. Bahkan menegakkan keadilan adalah dikira sebagai salah satu daripada tugas atau tanggungjawab kita sebagai manusia.

14. Dalam Islam keadilan itu sendiri bermaksud meletakkan sesuatu pada haknya. Tiga aspek keadilan yang paling penting dalam konteks ini ialah: Pertama, meletakkan seseorang pada jawatan atau tugas yang sesuai mengikut kemampuannya. Kedua, menjatuhkan hukuman atau membuat keputusan yang paling sesuai mengikut keadaan atau orang yang menerimanya. Ketiga, meletakkan harta atau kekayaan kepada orang yang benar-benar berhak memilikinya.

15. Dalam memilih seseorang untuk sebarang jawatan atau tugas, lebih-lebih lagi jawatan penting seperti hakim, Islam menentukan supaya orang yang paling layak sahaja dipertanggungjawabkan dengan tugas atau jawatan sedemikian. Sekiranya kita melantik orang yang bukan ahli dalam bidang berkenaan maka kita melakukan dua jenis kezaliman. Pertama, orang yang dilantik itu sendiri dizalimi kerana dia tidak akan dapat menyempurnakan tugasnya kerana tidak mempunyai kepakaran yang diperlukan. Dia akan merasa tertekan, bosan, tidak yakin kepada dirinya dan tidak berminat melakukan tugasnya. Kezaliman yang kedua ialah terhadap orang atau masyarakat yang seharusnya mendapatkan perkhidmatan daripada penjawat jawatan tadi. Mereka dizalimi kerana perkhidmatan yang diharapkan itu tidak akan terlaksana.

16. Dalam memilih pemimpin atau seseorang untuk sesuatu jawatan penting, Rasulullah s.a.w. pernah bersabda yang bermaksud bahawa "melantik seseorang kepada sesuatu jawatan (penting) sedangkan ada orang lain yang lebih layak untuk jawatan itu, adalah mengkhianati Allah, mengkhianati Rasulnya dan orang yang beriman". Ini bermakna bahawa dalam membuat perlantikan itu, suatu usaha yang rapi harus dilakukan untuk mencari calon yang paling layak dan sesuai di kalangan orang yang ada supaya kita tidak berlaku zalim kepada diri kita sendiri yang melantik, kepada yang dilantik dan kepada masyarakat yang mengharap perkhidmatan yang paling baik daripada perlantikan itu.

17. Daripada segi menjatuhkan hukum juga, Islam telah meletakkan berbagai-bagai panduan melalui al-Quran dan Sunnah Rasulullah s.a.w. supaya segala hukuman yang dijatuhkan hendaklah adil. Islam menetapkan supaya hakim itu dipilih daripada kalangan mereka yang paling layak daripada segi ilmu, kemampuan, kebijaksanaan serta ketakwaan. Cara yang harus digunakan hendaklah membolehkan segala maklumat didapatkan, ditapis dan ditimbang sehingga tidak ada sebarang kecurigaan untuk menjatuhkan hukuman. Orang yang menjadi saksi juga hendaklah meletakkan keadilan di atas segala kepentingan lain, walaupun kebenaran yang disaksikan itu boleh menjejaskan atau merugikan dirinya sendiri, keluarganya atau sahabatnya.

18. Membuat keputusan, sama ada dalam aspek sosial, politik, ekonomi mahupun pentadbiran dan pengurusan, juga hendaklah mencerminkan keadilan. Keputusan yang boleh membawa keburukan kepada mana-mana pihak adalah keputusan yang zalim.

19. Keadilan juga dituntut dalam mengagihkan kekayaan dalam bentuk harta ataupun peluang untuk mengumpulkan harta. Dalam hal ini, selain daripada pengagihan harta secara langsung, pengagihan peluang untuk mengumpulkan harta juga perlu dilakukan dengan adil. Ini termasuklah pengagihan peluang

kepada pendidikan, peluang perniagaan, dan peluang- peluang lain.

20. Islam menuntut keadilan bukan daripada kalangan pemimpin atau pemerintah sahaja tetapi di kalangan seluruh masyarakat asalkan wujud salah satu daripada tiga keadaan di atas. Dengan itu jika orang ramai diberi hak untuk memilih pemimpin, mereka hendaklah memilih orang yang layak dan berkebolehan. Segala rasuah, seperti menuntut sesuatu bagi diri sendiri atau pihak tertentu sebagai balasan kepada sokongan yang diberi adalah bertentangan dengan keadilan dalam Islam.

21. Kepincangan masyarakat di dunia hari ini adalah kerana masyarakat antarabangsa tidak mengamalkan prinsip keadilan. Masyarakat antarabangsa begitu zalim terhadap golongan- golongan yang lemah. Sekali lagi contoh Bosnia boleh digunakan. Puak Islam yang lemah tidak dibenar mendapatkan senjata walaupun hanya untuk mempertahankan diri. Pihak Serb yang sudah kuat dibenar mendapatkan bekalan senjata lagi. Dan sekarang kuasa besar bersetuju memberi wilayah Islam yang dirampas oleh orang Serb kepada mereka tanpa memperdulikan hak orang Islam.

22. Bagi kuasa besar, Serb yang kuat adalah benar dan orang Muslim yang lemah adalah salah dan tidak berhak. Namun kuasa- kuasa Barat ini masih mendakwa diri mereka adalah benar dan adil. Apakah dapat kita menerima konsep dan prinsip keadilan Barat ini sebagai asas keadilan bagi masyarakat kita? Tidakkah perlu kita menolak konsep dan prinsip keadilan mereka melainkan jika ianya tidak bertentangan dengan keadilan Islam seperti yang dihuraikan sebentar tadi?

23. Sejarah perundangan membuktikan bahawa proses mengkanunkan undang-undang dimula dan dilaksanakan oleh orang Islam. Dengan proses ini undang-undang Islam menjadi lebih tepat dan teratur. Di samping itu, oleh kerana mereka yang mengkanunkan undang-undang Islam adalah manusia biasa yang tidak sunyi daripada kecacatan, pembetulan dan penyesuaian hendaklah dilakukan kepada kanun undang-undang mengikut zaman dan tempat. Dengan cara ini undang-undang yang diasaskan kepada al-Quran dan Hadis akan sesuai dengan keadaan di sepanjang zaman.

24. Jenayah berubah di sepanjang masa. Di zaman moden ini terdapat jenayah dagangan atau 'commercial crime' yang begitu halus dan kompleks sehingga sukar menentukan kesalahan yang telah dilakukan. Jika tidak ada satu usaha untuk mengenalpasti jenayah ini dan menentukan hukuman yang sesuai dengan ajaran agama maka banyaklah jenayah yang akan melanda masyarakat. Demikian juga dengan beratus-ratus jenayah lain yang muncul di zaman ini. Usaha perlu dibuat supaya sistem perundangan negara

tidak bercanggah dengan konsep dan prinsip keadilan dalam Islam.

25. Dalam Islam banyak kelonggaran diberi kerana mengambilkira keadaan di sekeliling. Dalam semua ibadat terdapat kelonggaran ini. Dengan ini amalan cara hidup Islam tidaklah menjadi beban sehingga menyusah dan memudaratkan orang Islam dan menyebabkan mereka tersisih daripada aliran zaman.

26. Hari ini orang Islam terdapat di mana-mana sahaja dan tidak hanya di negara Islam. Di kebanyakan negara mereka menjadi puak minoriti. Sebagai minoriti mereka tidak dapat melaksanakan undang-undang Islam yang diamalkan oleh negara-negara yang dikuasai seratus peratus oleh orang Islam.

27. Di samping itu amatlah penting pemerintahan oleh orang Islam diakui adil oleh semua pihak, termasuk orang yang bukan Islam. Semenjak dari zaman Rasulullah lagi pemerintahan Islam di Madinah dan kemudian di Mekah bersikap adil kepada orang bukan Islam. Paksaan supaya menerima agama Islam dan undang-undang untuk orang Islam, rampasan harta dan penindasan tidak dilakukan oleh pemerintah Rasulullah dan Khalifah-khalifah Al-Rashidin. Adakalanya hukuman yang dijatuhkan ke atas orang bukan Islam diasaskan kepada undang-undang agama mereka. Oleh kerana adilnya pemerintahan Islam maka akhirnya ramai rakyat bukan Islam telah memeluk agama Islam dan meletakkan diri mereka di bawah undang-undang Islam.

28. Pemerintahan yang diterajui oleh orang Islam di Malaysia yang mempunyai rakyat dan penduduk berbilang agama hendaklah membuktikan kepada semua pihak, Islam dan bukan Islam, bahawa pemerintahan mengikut konsep dan prinsip-prinsip keadilan Islam adalah benar-benar adil. Jika hari ini terdapat gambaran bahawa Islam keterlaluan atau kejam sebabnya bukanlah ajaran Islam itu kejam tetapi ada orang Islam yang, apabila berkuasa, menjadi angkuh dan tidak mengikut ajaran al-Quran dan Hadis dan contoh pemerintahan Rasulullah dan Khalifah-khalifah yang terkenal dalam sejarah Islam. Orang Islam yang berkuasa, hakim dan pentadbir Islam di Malaysia tidak harus angkuh kerana berkuasa dan melupakan ajaran Islam mengenai keadilan. Amatlah penting pemerintahan yang diterajui oleh orang Islam di Malaysia membuktikan bahawa pemerintahan mereka adil kepada semua pihak, tidak berat sebelah dan tidak menindas. Adalah menjadi tanggungjawab semua orang Islam untuk membetulkan imej Islam yang tidak baik yang disebabkan oleh kumpulan-kumpulan penyeleweng ekstrimis yang telah memberi gambaran yang tidak baik kepada agama Islam dan penganutnya.

29. Di samping itu, kita tidak boleh lupa bahawa bagi dunia sekarang ini kekuatan dianggap kebenaran. Negara-negara Islam termasuk Malaysia perlu mengejar kekuatan. Untuk ini perkara

yang utama dan penting ialah menegakkan pemerintahan yang adil dan cekap supaya kemajuan dicapai sehingga setaraf dengan negara-negara maju yang lain. Apabila sudah maju maka baharulah persiapan dapat dibuat untuk menaikkan keupayaan pertahanan negara menjadi sama dengan negara-negara maju dalam semua bidang. Ini adalah wajib kerana telah disebut dalam al-Quran, Surah Al- Anfal, Ayat 60 yang bermaksud:

"Dan siapkanlah untuk menghadapi mereka kekuatan apa sahaja yang kamu sanggupi dan dari kuda-kuda yang ditambat untuk berperang (yang dengan persiapan itu) kamu menggentarkan musuh Allah, musuhmu dan orang-orang selain mereka yang kami tidak mengetahuinya, sedang Allah mengetahuinya".

30. Jika hari ini negara-negara tertentu dan bangsa-bangsa seperti Serb dan Yahudi berani dan dapat menindas dan mengganas, sebabnya ialah oleh kerana negara-negara Islam semuanya lemah. Ajaran al-Quran berkenaan persiapan untuk pertahanan tidak dihiraukan. Pemerintahan mereka kerap tidak adil dan tidak berjaya mewujudkan keamanan dan ketenteraman yang diperlukan untuk pertumbuhan ilmu, kecekapan dan kekayaan, yang mana semua ini diperlukan untuk kekuatan dan kehormatan.

31. Justeru itu, sebelum kita umat Islam menyalahkan pihak lain semata-mata, kita harus soal diri kita sendiri tentang amalan ajaran agama kita, terutama daripada segi menegakkan pemerintahan yang adil. Jika keadilan Islam tidak terbukti dan sukar diterima umum, kesalahannya adalah juga pada diri kita.

32. Sebab itu, amatlah penting bukan sahaja memperkatakan tentang keadilan Islam tetapi kita membuktikan bahawa konsep dan prinsip-prinsip keadilan dalam Islam memang dapat menegak kebenaran dan mewujudkan masyarakat yang bahagia.

33. Saya berharap persidangan ini akan berjaya menjelaskan konsep dan prinsip-prinsip keadilan dalam Islam supaya keraguan dan imej yang buruk terhadapnya dapat dihapuskan dan dunia dapat menyedut daripada keadilan ala-Islam unsur-unsur yang boleh mengatasi ketidakadilan yang sedang berlaku hasil keangkuhan kuasa-kuasa dunia sekarang.

34. Dengan ini, saya dengan sukacitanya merasmikan Persidangan 'Islam dan Keadilan'.

Wabillahi taufik walhidayah, wassalamu'alaikum warahmatullahi wabarakatuh.